

唐武安節度使陳公墓道記

吾陳氏多祖江州義門義門之族自宋嘉祐間奉勅析居別爲莊百二十有八繇是遷徙徧東南獨今湖南所遷支更在宋前蓋以唐武安節度使朝禕公爲始祖云公諱端字朝禕世居江州唐季旌義門授家長崇長史公之舅弟也父諱克純登進士第公亦繼成進士曹州賊僭僞號唐以墨勅徵天下兵公討賊有功授武安節度使鎮潭州封威烈將軍史雖未著公行誼勲績然以族系繁衍昌大卜之必有功德以福茲土之人可知也致仕居長沙歿葬瀏陽北鄉筭箕坡艮坤兼寅申爲兆配宋氏

趙氏皆封夫人祔於墓子伯萬後裔居潭州者曰滄浪莊歛田莊爲尤著光緒二十一年署湖南提督綏靖鎮總兵程初君海鵬偕族姓子弟走拜公墓歲久失治交慨於心於是飾其廩圯薙其蓬棘糾工甃石斬然更新程初君以寶箴亦義門之裔也屬紀其緇竊以寶箴德薄能鮮忝撫是邦蓋去公爲節度使時千有餘歲方懼尸位苟祿貽前人之辱抑猶冀馮公寵靈回菑變而康世屯焉程初君則久在兵間譽望隆起追遠之義待於舊典觀山川之鬱蟠念先澤之未泯其仁孝返本靖共匪懈之思宜有油然而生者矣遂謹書之以示後之人

欽命頭品頂戴兵部侍郎兼都察院右副都御史巡撫湖南等處地方義門裔孫義甯寶箴恭記

翰林院庶吉士臨川李瑞清書丹

清光緒二十有三年歲在丁酉二月造